

摘藻堂四庫全書薈要

集部

欽定四庫全書叢要

集部

漢魏六朝百三家集卷一百一



詳校官候選知縣臣吳甸華

欽定四庫全書薈要卷一萬九千六百九十三

集部

漢魏六朝百三家集卷一百一

明 張溥 輯



吳均集

賦

吳城賦

古樹荒烟幾千百年云是吳王所築越王所遷東有鑄
劍殘水西有舞鶴故堰紫具區之廣澤帶姑蘇之遠山

僕本蓄怨千悲億恨況復荆棘蕭森叢蘿彌蔓亭梧百尺皆歷地而生枝階筠萬丈或至杪而無葉不見春荷夏槿唯聞秋蟬冬蝶木魅晨走山鬼夜驚不知九州四海乃復有此吳城

八公山賦

峻極之山蓄聖表仙南參差而望越北邈迤而懷燕爾其盤桓基固含陽藏霧絕壁嶮巖層巖迴互挂皎月而常團雲望空而自布袖以華閭帶以潛淮文星亂石藻

日流堦若夫神基巨鎮而卓犖荆河箕風畢雨育嶺生
我高岑直兮蔽景修坂出兮祭天以迎雲而就日若從
漢而迴山露泣葉而原淨花照磯而岫鮮促嶂萬尋平
崖億絕上被紫而烟生傍帶花而來雪維英王兮好仙
會八公兮小山駕飛龍兮翩翩高馳翔兮冲天

碎珠賦

寶月生焉越浦隋川標魏之美擅楚之賢既登席而趨
麗亦綴履而升妍豈銜恩以赴時獨佩皎而騰天瀛淮

激電甘海震雷明珠碎矣于川之隈視員流而失轉見
折水之亡迴謝驪宮之瑞飾粉靈蚌之神胎若有人兮
聲芒昧芳微斷分明珠碎明珠碎兮愴何宜珠之形兮
不復全撫陸離之瓊珮吊幽翳之金筵宣照車與璿燭
但黃塵及寒烟聊歌曰玉山之津兮已濡幽蘭之草兮
亦舒又聞珩璧之獨照不見掌上之明珠已矣哉若使
青雲之可尚當與碎珠之同棲

橘賦

增枝之木既稱英於綠地金衣之果亦委體於玉盤見
雲夢之千樹笑江陵之十蘭葉葉之雲共琉璃而並碧
枝枝之日與金輪而共丹若乃秋夜初露長郊欲素風
賈寒而北來鴈銜霜而南渡方散藻於季深遂凝貞於
冬暮

筆格賦

幽山之桂樹恒縈風而抱霧葉委鬱而陸離根縱橫而
盤互爾其負霜含液枝翠心赤翦其匡條為此筆格跌

闕則巖巖方爽似華山之孤生上管則員員峻逸若九
疑之爭出長對坐而銜烟永臨窻而儲筆

表

為建安讓加司徒表

臣聞元黃之馬事絕於銜鑣蟠朽之材飾垂於丹漆何
則千里之志已窮萬乘之器無取遠物近身於馬在譬
書

與顧章書

僕去月謝病還覓薜蘿梅溪之西有石門山者森壁爭
霞孤峰限日幽岫含雲深谿蓄翠蟬吟鶴唳水響猿啼
英英相雜綿綿成韻既素重幽居遂葺宇其上幸富菊
花偏饒竹實山谷所資於斯已辦仁智所樂豈徒語哉

與朱元思書

風烟俱淨天山共色從流飄蕩任意東西自富陽至桐
廬一百許里奇山異水天下獨絕水皆縹碧千丈見底
游魚細石直視無礙急湍甚箭猛浪若奔夾峰高山皆

生寒樹負勢競上互相軒邈爭高直指千百成峰泉水
激石泠泠作響好鳥相鳴嚶嚶成韻蟬則千轉不窮猿
則百叫無絕鳶飛唳天者望峰息心經綸世務者窺谷
忘反橫柯上蔽在晝猶昏疎條交映有時見日

與施從事書

故鄣縣東三十五里有青山絕壁干天孤峰入漢綠嶂
百重清川萬轉歸飛之鳥千翼競來企水之猿百臂相
接秋露為霜春蘿被逕風雨如晦雞鳴不已信足蕩累

頤物悟衷散賞

檄

檄江神責周穆王壁文

昔穆王南巡自郢祖閩遺我文壁僉曰此津貫緯百紀
薦歷千春念茲文壁故問水濱江漢勗之自求多益反
我名瑞躍此華壁則富有漢川世為江伯如有負穢心
迷懷釁情戚藏玉泥中匿珪魚腹使公孫躡波而長吁
子羽濟川而怒目佽飛舞劍而東臨菑丘躍馬而南逐

打素蛤而為粉碎紫貝其如粥又有川人勇俊處乎閩
漢水居百里泥行萬宿右睨而河傾左咤而海覆乃把
昆吾之銅純鉤之鐵被魚鱗之衣赴螺蚌之穴引澍東
隅移焦北島使蓬萊之根鬱而生塵瀛洲之足淨而可
掃按驪龍取其頷下之珠搦鯨魚拔其眼中之寶皇恩
所被繁枯潤涸威之所加窮河絕漠願子三思反此明
玉

食移

月光離畢風氣入箕細雨如網細柳如絲離隔東西之
怨眺望山川之阻企龍門而不見覽桂枝而延佇此乃
方寸之恒情羗難得而覩縷也亦有鮑叔分財華歆讓
位乃相知於平生實忘懷於寤寐雞有呼羣之德鹿有
食草之美在微物其尚然況仁義之君子哉今足下居
則廣夏高堂連間洞房綺窻半卷屏風角張指天地如
一指安知故人之可傷一死一生乃知交情一貴一賤
交情乃見謂古今之恒談在今日而方見嗚呼如何忘

我實多輒欲彈琴縱酒於首陽之阿君有厨中腐肉而
僕不厭糟糠君有鴈鶩之食而余不得一嘗願以小人
之腹為君子之腸何如哉今欲君之餘江皋綠蔬之筍
洞庭紫鬣之魚昆山龍胎之脯玄圃鳳足之苴千里萼
羹萬丈名膾氣馨若蘭色美如艾扶南甘蔗一丈三節
白日炙之便銷清風吹之即折安定之梨皮薄味厚一
歲三花一枚二斗凡厥上味惟君能施君若不施成君
深累於神為不祥於人為憊義

說

餅說

宋公至長安得姚泓時故大官丞程季者了了人也公
曰今日之食何者最先季曰仲秋禦景離蟬欲靜燮燮
曉風淒淒夜冷臣當此景唯能說餅公曰善季乃稱曰
安定噎鳩之麥洛陽董德之磨河東長若之葱隴西舐
背之犢枹罕赤髓之羊張掖北門之豉然以銀屑煎以
金銚洞庭負霜之橘仇池連蒂之椒調以濟北之鹽剉

以新豐之雞細如華山之玉屑白如梁甫之銀泥既聞
香而口悶亦見色而心迷公曰善

連珠

連珠二首

蓋聞豔麗居身而以蛾眉入妒貞華炤物而以絕等見
猜是以班姬辭寵非無妖冶之色揚子寂寞豈乏炫曜
之才

蓋聞義夫投節未必識君烈士赴危非期要利是以墨

子縈帶不蒙肉食之謀申胥泣血非有執圭之位

樂府

戰城南

蹀躞青驪馬往戰城南畿五歷魚麗陣三八九重圍名
惜武安將血汙秦王衣為君意氣重無功終不歸

又

此與下篇藝文失題列戰城南
南後英華遂以為題當再考

前有濁樽酒

一作酒樽

憂思亂紛紛小來

一作少年

重意氣學劍

不學文忽值胡關靜匈奴遂兩分天山已半出龍城無

片雲漢世平如此何用李將軍

又

陌上何諠諠匈奴圍塞垣
黑雲藏趙樹黃塵埋隴垠
天子羽書勞將軍在玉門

闕

雉子班

可憐雉子班羣飛集野甸
文章始陸離意氣已驚狷
幽并遊俠子直心亦如箭
生死報君恩誰能孤恩眊

入關

羽檄起邊庭烽火亂如螢是時張博望夜赴交河城馬
頭要落日劍尾掣流星君恩未得報何論身命傾

梅花落

終冬十二月寒風西北吹獨有梅花落飄蕩不依枝流
連逐霜彩散漫下冰澌何當與春日共映芙蓉池

城上烏

嗚嗚城上烏翩翩尾畢逋凡生八九子夜夜啼相呼質
微知慮少體賤毛衣麗陛下三萬歲臣至執金吾

從軍行

男兒亦可憐立功在北邊
陣頭橫却月馬腹帶連錢
懷戈發隴坻乘凍至遼川
微誠君不愛終自直如弦

胡無人行

劍頭利如芒怕持照眼光
鐵騎追驍虜金羈討黠羌
高秋八九月胡地早風霜
男兒不惜死破膽與君嘗

雉朝飛操

二月雉朝飛橫行傍壠歸
斜看水外翟側聽嶺南
鸞躑

蹠恒欲戰耿耿恃彊威當令君見賞何辭碎錦衣

渡易水歌

襟虜客來齊時余在角觝揚鞭渡易水直至龍城西日
昏笳亂動天曙馬爭嘶不能通瀚海無面見三齊

結客少年場

結客少年歸翩翩駿馬肥報恩殺人竟賢君賜錦衣握
蘭登建禮拖玉入含暉顧看草玄者功名終自微

妾安所居

賤妾先有寵蛾眉進不遲一從西北麗無復城南期何
因一作暫豔逸豈為乏妍姿徒有黃昏望寧遇青樓時
惟惜應門掩方餘永巷悲匡牀終不共何由橫自私

送歸曲

送子獨南歸攬衣空憫默關山晝欲暗河冰夜向塞燕
至他人鄉鴈去還誰國寄子兩行書分明達濟北

夾樹

桂樹夾長陂復值清風吹氤氳揉芳葉連綿交密枝能

迎春露點不逐秋風移願君長惠愛當使歲寒知

城上麻

麻生滿城頭麻葉落城溝麻莖左右披溝水東西流少年感恩命奉劍事西周但令直心盡何用返封侯

擬古四首

陌上桑

嫋嫋陌上桑陰陌復垂塘長條映白日細葉隱鸝黃蠶
饑妾復思拭淚且提筐故人寧知此離恨煎人腸

秦王卷衣

咸陽春草芳秦帝卷衣裳玉檢茱萸匣金泥蘇合香初
芳薰複帳餘輝耀玉牀當須晏朝罷持此贈華陽

一作龍陽

采蓮曲

錦帶襟花鈿羅衣垂綠川問子今何去出采江南蓮遼
西三千里欲寄無因緣願君早旋返及此荷花鮮

攜手曲

豔裔陽之春攜手清洛濱雞鳴上林苑薄暮小平津長

裾藻白日廣袖帶芳塵故交一如此新知詎憶人

采蓮曲

江風當夏

一作夜

清桂檝

一作權

逐流縈初疑京兆劍復似

漢冠名荷香帶風遠蓮影向根生葉卷珠難溜花舒紅
易傾日暮見舟滿歸來度錦城

三婦豔詩

大婦弦初切中婦管方吹少婦多姿態含笑逼清卮佳
人勿餘及殷勤妾自知

大垂手

垂手忽迢迢飛燕掌中嬌
羅衫恣風引輕帶任情搖
詎似長沙地促舞不回腰

小垂手

舞女出西秦躡影舞陽春
且復小垂手廣袖拂紅塵
折腰應兩笛頓足轉雙蛾
眉與曼臉見此空愁人

有所思

薄暮有所思終持淚煎骨
春風驚我心秋露傷君髮

雍臺

雍臺十二樓樓樓鬱相望隴西飛狐口白日盡無光

楚妃曲

春妝約春黛如月復如蛾玉釵照繡領金薄側紅羅

白浮鳩

瑯琊白浮鳩紫翳飄陌頭食飲東莞野棲宿越王樓

陽春歌

紫苔初泛水連綿浮且沒若欲歌陽春先歌青樓月

別鶴

別鶴尋故侶
聯翩遼海間
單棲孟津水
驚唳隴頭山

淶水曲

香暖金堤滿
湛淡春塘溢
已送行臺花
復倒高樓日

綠竹

嬋娟鄣綺殿
繞弱拂春漪
何當逢採拾
為君笙與篴

行路難五首

洞庭水上一株桐
經霜觸浪困巖風
昔時抽心耀白日

今日卧死黃沙中洛陽名工見咨嗟一剪一刻作琵琶
白璧規心學明月珊瑚映面作風花帝王見賞不見忘
提攜把握登建章掩抑摧藏張女彈殷勤促柱楚明光
年年月月對君子遙遙夜夜宿未央未央綵女棄鳴篳
爭先拂拭生光儀茱萸錦衣玉作匣安念昔日枯樹枝
不學衡山南嶺桂至今千載猶未知

青瑣門外安石榴連枝接葉夾御溝金墉城西合歡樹
垂條照彩拂鳳樓遊俠少年游上路傾心傾倒想戀慕

摩頂至足買片言開胃瀝膽取一顧自言家在趙邯鄲
翩翩古杪復劍端青驪白駿的盧馬金羈綠鞵紫絲鞶
躩蹠橫行不肯進夜夜汗血至長安長安城中諸貴臣
爭貴儒者席上珍復聞梁王好學問輕棄劍客如埃塵
吾丘壽王始得意司馬相如適被申大才大辯尚如此
何況我輩輕薄人

君不見西陵田從橫十字成陌阡君不見東郊道荒涼
蕪沒起寒烟盡是昔日帝王處歌姬舞女達天曙今日

翩妍少年子不知華盛落前去吐心吐氣許他人今旦
迴惑生猶豫山中桂樹自有枝心中方寸自相知何言
歲月忽若馳君之情意與我離還君玳瑁金雀釵不忍
見此使心危

君不見長安客舍門倡家少女名桃根貧窮夜紡無燈
燭何言一朝奉至尊至尊離宮百餘處千門萬戶不知
曙唯聞啞啞城上烏玉欄金井牽轆轤丹梁翠柱飛流

蘇香薪桂火炊雕胡

一作彫菰

當年翻覆無常定薄命為女

何必鹿麕

君不見上林苑中客冰羅霧縠象牙席盡是得意忘言
者探腸見膽無所惜白酒甜鹽甘如乳綠觴皎鏡華如
碧少年持名不肯嘗安知白駒應過隙博山鑪中百和
香鬱金蘇合及都梁逶迤好氣佳容貌經過青瑣歷紫
房已入中山馮玉臺作陰后帳復上皇帝班姬牀班姬失寵
顏不開奉帚供養長信臺日暮耿耿不能寐秋風切切
四面來玉階行路生細草金鑪香炭變成灰得意失意

須臾頃

一作問

非君方寸逆所裁

詩

王侍中夜集

抽蘭開石路剪竹製山扉
文淪見綠水參差隱翠微
西山採藥至東都謝病歸
紡毛織野服縫芟作山衣
欲知三青鳥簷上素雲飛

登鍾山燕集望西靜壇

客思何以緩春郊滿初律
高車陸離至駿騎差池出
寶

腕汎蓮花珍杯食竹實才勝商山四丈高竹林七復望
子喬壇金繩蘊綠帙風雲生屋宇芝映被仙室方隨鳳
凰去悠然駕白日

與柳惲相贈答六首

黃驪飛上苑綠芷出汀洲日映昆明水春生鷓鴣樓飄
颺白花舞瀾漫紫萍流書織迴文錦無因寄隴頭思君
甚瓊樹不見方離憂

鳴鞭適大阿聯翩渡漳河燕姬及趙女挾瑟夜經過織

腰曳廣袖半額畫長蛾客本倦遊者箕帚在江沱故人
不可棄新知空復何

離居苦無樂回慕心悽悽要途訪趙使聞君仕執珪杜
蘅色已發菖蒲葉未齊罽屨蠶餌罌差池燕吐泥願逐
東風去飄蕩至遼西

白日隱城樓勁風掃寒木離枿隔東西執手異涼燠相
思咽不言洞房清且肅歲去甚流烟年來如轉軸別鶴
千里飛孤雌夜未宿

間房肅已靜落月有餘輝寒蟲隱壁思秋蛾繞燭飛絕
雲斷更合離禽去復歸佳人今何在迢遞江之沂一為
別鶴弄千里淚沾衣

秋雲靜晚天寒夜方綿綿聞君吹急管相思雜采蓮別
離未幾日高月三成弦蹠疊黃河浪嘶唱隴頭絃寄君
薜蘿葉插著叢臺邊

贈柳真陽

王孫清且貴築室芙蓉池羅生君子樹襟種女貞枝南

牕帖雲母北戶映琉璃
銜書轆轤鳳坐水玉盤
螭朝衣
茱萸錦夜覆葡萄
卮聯翩驂亦免窈窕
駕青驪龍泉甚
鳴利如何獨不知

贈任黃門二首

相如體英彥左右生容輝
已紆漢帝組復解梁王衣
經過雲母扇出入千門扉
連洲茂芳杜長山鬱翠微
欲言終未敢徒然獨依依

紛吾少馳騁自來乏名德
白玉鏤衢鞍黃金瑪瑙勒
射

鵬靈丘下驅馬鴈門北殷勤盡日華留連窮景黑歲暮
竟無成憂來坐默默

酬蕭新浦王洗馬二首

始可結交者文酒滿金壺圍碁帝臺局繫馬秦王蒲長
劍皆玉具短笛悉銀塗送歸日愁滿留客袂紛吾今成
桓山上秋風星散烏

思君出江湄慷慨臨長薄獨對東風酒誰舉指南酌崇
蘭白帶飛青鷄紫纓絡一年流淚同萬里相思各胡為

舍旃去故人在宛洛

答蕭新浦

僕本二陵徒英豪多久要角祗良家兒期門惡年少身
一作紆丈二組手擎尺一詔問子行何去高帆艤江干

今夜杯酒別明朝江水邊莓莓看細雨漠漠視濃烟颯
灑八銅剪低昂五會船欲知故人者江南共采蓮悒然
心不樂跨馬出城壕觀濤看白鷺望草見青袍青袍行
中把蔽草覆平野公子不垂堂紛紛故交者肘懸辟邪

印屋曜鴛鴦瓦翩翩流水車蕭蕭曳練馬是時君別我
青莎沒馬蹄連連文蠶罽鷲鷲伺朝鷄今日余懷友積
恨一作雪滿東西

酬周參軍

日暮憂人起倚戶悵無懼水傳洞庭遠風送鴈門寒江
南霜雪重相如衣服單沈雲隱喬樹細雨滅層巒且當
對樽酒朱絃永夜彈

贈杜容成

一燕海上來一燕高堂息一朝相逢遇依然舊相識問
余來何遲山川幾紆直答言海路長風駛飛無力昔別
縫羅衣春風初入帷今來夏欲晚桑扈

一作桑城

薄樹飛

贈朱從事

我行欲何之千里尋膠漆長葭歷渚生疎蒲緣岸出裊
裊能隨風離離堪度日客思已飄蕩相思復非一未得
幸殷勤先作數行泣

贈姚郎

星漢正參差
佳人不在斯
宿昔暫非阻
何異遠分離
露染蘼蕪葉
日照芄蘭枝
風光已飄薄
雲采復逶迤
勞夢無人覺
默默心自知

贈王桂陽別三首

昔聞楊伯起
拖玉振清風
高華積海外
名實滿山東
自有五都相
非無四世公
臨窻驚白日
倚匣曳輕虹
願持鷓鴣羽
歲暮依梧桐

客子慘無歡
送別江之干
白雲方渺渺
黃鳥尚關關
斜

紛巫山石合沓洞庭瀾行衣侵曉露征舸犯夜湍無因
停合浦見此去一作珠還

樹響泐山來猿

一作漢

聲繞岫急旅帆風飄揚行巾露沾

濕深浪閣蒹葭濃雲沒城邑不見別離人獨有相思泣

酬別江主簿屯騎

有客告將離贈言重蘭蕙泛舟當泛濟結交當結桂濟
水有清源桂樹多芳根毛公與朱亥俱在信陵門趙瑟
鳳凰柱吳醵金罍樽我有北山志留連為報恩夫君皆

逸翮搏景復凌騫白雲間海樹秋日暗平原寒蟲鳴趯
趯落葉飛翻翻何用贈分首自有北堂萱

酬別

故人杯酒別天清明月亮露下寒葭中風起秋江上衣
染潺湲淚棹犯參差浪七首直千金七寶雕華裝
生離何用表賴此持相餉

側亮反

贈別新林

一作江潭怨

僕本幽并兒抱劍事邊陲風亂青絲絡霧染黃金羈天

子既無賞公卿竟不知去去歸去來還傾鸚鵡杯氣為
故交絕心為新知開但令寸心是何須銅雀臺

發湘州贈親故別三首

相送出江潯淚下沾衣襟何用叙離別臨歧贈好音敬
通才如此君山學復深明哲遂無賞文華空見沈古來
非一日無事更勞心

雲生曉靄靄花落夜霏霏問金何意別答言倦遊歸徒
勞易水布空負洛陽衣懷金無人別抱玉遂成非安得

金夕口人
卷一百一
久留滯商山饒白薇

君留朱門裏我至廣江濱城高望猶見風多聽不聞流
蘋方繞繞落葉向一作尚紛紛無由得共賞山川間白雲

同柳吳興烏亭集送柳舍人

河陽一悵望南浦送將歸雲山離掩曖花霧共依霏流
連百舌哢下上陽禽飛桂舟無淹柁玉軫有離徽願君
嗣蘭杜時采東皋薇

同柳吳興何山集送劉餘杭

王孫重離別置酒峯之畿
逶迤川上草參差澗裏薇
輕雲紉遠岫細雨沐單衣
簷端水禽息牕上野螢飛
君隨綠波遠我逐清風歸

送柳吳興竹亭集

平原不可望波瀾千里直
夕魚汀下戲暮雨簷中息
白雲時去來青峯復負側
躑躅牛羊下晦昧掩磁色
王孫猶未歸且聽西光匿

初至壽春作

桓譚不賣交馮子任紆直浮溺逐波影飄揚恣風力北
州少知舊南陽寡相識中駕每傾輪當騫復摧翼望美
無津梁私自憐何極

登壽陽八公山

遠澗自傾曲石湫復爻爻含珠岸恒翠懷玉浪多圓疎
峯時吐月密樹下開天瑤繩盡玄秘金檢上竒篇是有
琴高者陵波去水仙

壽陽還與親故別

故人來送別，帳酒臨行。阡露繁秋色，慢氣愴蟪聲煎。鴈
渡章華國，葉亂洞庭天。復有向隅淚，中腸皆涕漣。但願
千丈松結景，雲之峯山高。日華早枝多，風彩重我還。愛
芳杜，君住揖驪龍。

邊城將四首

塞外何紛紛，胡騎欲成羣。爾時始應募，來投霍冠軍。刀
含四尺影，劍抱七星文。袖間血灑地，車中旌拂雲。輕軀
如未殞，終當厚報君。

僕本邊城將馳射靈闕下箭銜鴈門石氣振武安瓦勳
輕賞廢丘名高拜橫野留書應鑿楹傳功須勒社徒傾
七尺命酬恩終自寡

聞君報一餐遠送出平野玉標丹霞劍金絡豔光馬高
旗入漢飛長鞭歷地寫曙星海中出曉月山頭下歲晏
坐論功自有思臣者

臨淄重蹴踘曲城好擊刺不要身後名專騁眼前智君
看班定遠立功不負義掣拽二丈旗躑躅雙鳧騎但問

相知否死生無險易

秋念

團團珠暉轉炤炤漢陰移箕風入桂露壁月滿瑤池樹
青草未落蟬涼葉已危還深長夜想顧憶臨邛庖芳杜
果蕪沒纓帶欲何為

春怨

四時如湍水飛奔競迴復夜鳥響嚶嚶朝花照煜煜厭
見花成子多看筍成一作竹萬里斷音書十載異棲宿

金方... 卷一百一
積愁落芳鬢長啼壞美目君去往榆關妾留住函谷唯
對昔邪房如愧蜘蛛屋獨喚響相酬還持影自逐象牀
易壇簞羅衣變單複幾過度風霜猶能保瓊獨

采藥大布山

我本北山北緣澗采山麻九莖日反

一作
間

照三葉長生

花可用蠲憂疾聊持駐景斜景斜不可駐年來果如驅
安得崑崙山偃蹇三珠樹三珠始結葦絳葉凌朱臺玉
壺白鳳肺金鼎青龍胎韓衆及王子何世無仙才安期

儻欲顧相見在蓬萊

贈周散騎興嗣二首

子雲好飲酒家在成都縣製賦已百篇彈琴復千轉敬
通不富豪相如本貧賤共作失職人包山一相見

昔一作吾賢當路者聲名振華夏朱輪玳瑁車紫鞵連錢

馬朝花舞風中夜月窺牕下想君貴易朋居然應見舍
贈周興嗣四首

孺子賤而貧且非席上珍唯安菜蕪甑兼慕林宗中百

年逢繾綣千里遇殷勤願持江南蕙以贈生芻人
思君欲何言中心亂如霧淚下非一端愁來誰有數子
為馮敬通不減汲長孺千里無關梁安得王喬屨
與君初相知不言異一宿意欲褰衣裳陰雲亂人目之
子伏高卧伊予空杼軸無因渡淇水見此猗猗竹
可怨思公子終自不敢言青松蔽南隴白雲生北園沈
憂無人語默念空憑軒安得湛盧劍以報相知恩

入蘭臺贈王治書僧孺

故人揚子雲拔書麟閣下寂寞少交遊紛綸富文雅予
為隴西使寓居洛陽社相思非不深行行避驄馬

江上酬鮑幾

振棹出江湄依依望九疑欲謁蒼梧帝過問沅湘姬折
荷縫作葢落羽紡成絲吾行別有意不為君道之

贈柳秘書

靡蕪與丹桂竒心復竒骨已蔽蒼龍門又影鳳皇闕紫
雲依夜來清風扶晚發駕鷲若上天寄聲謝明月

詣周承不值因贈此詩

竹枝任風轉蘭心逐風卷青雲葉上圍白露花中泣聞
君入騎踈聊寄錦中書一隨平原客寧憶豫章徐

遙贈周承

巨石亂天涯雜樹鬱參差伯魚留蜀郡長房還葛陂練
練波中月亭亭雲上枝高岑蔽人者無處得相知

周承未還重贈

石渠閒無人子雲今何在顧望獨懷憂銜杯竟誰待散

雪逐吹寒蓬姿浮霜采甘泉無竹花鷓雛欲還海

贈王桂陽

松生數寸時遂為草所沒未見籠雲心誰知負霜骨弱
榦可摧殘纖莖易凌忽何當數千尺為君覆明月

酬郭臨丞

聞君立名義我亦倦晨征馬在城上蹀劍自腰中鳴白
日遼川暗黃塵隴坻驚願君但銜酒深知有素誠

憶費昶

皎皎日將上獵獵起微風
山沒清波內帆在浮雲中
直趣珠星北斜開碧海東
故人若思我當念離根蓬

酬聞人侍郎別三首

悵然心不樂萬里向悠悠
凌朝憩枉渚薄暮遵江洲
君住青門上我發霸陵頭
相思自有處春風明月樓

整棹北川湄迴首望城邑
林疎風至少山高雲度急
共懷萬里心各作千行泣
欲見終無緣思君空佇立

舉首川之折

當作折

離鴻四向飛子憐三湘薜
我憶五陵

薇但使同嘉遁何必共輕肥
思君美如玉不覺淚沾衣
贈鮑春陵別

落葉思紛紛蟬聲猶可聞
水中千丈月上萬重雲
海鴻來倏去林花合復分
所憂別離意白露下霑裙

別王謙

嚴光不逐世流轉任飛蓬
欲還天台嶺不狎甘泉宮
離歌玉絃絕別酒金卮空
倘遺故人念僕在東山東

奉使廬陵

悵然不自怡端憂坐漠漠風急鴈毛斷冰堅馬蹄落客
子饑寒多江上衣裝薄何當報恩罷驅車還北郭

迎柳吳興道中

團團日西靡客念已蹉跎長風倒危葉輕練網寒波白
雲光彩麗青松意氣多所言飽恩德忘我北山蘿

至湘洲望南嶽

重波淪且直連山糾復紛鳥飛不復見風聲猶可聞
隴樹裏月飄飄水上雲長安遠如此無緣得報君

登二妃廟

朝雲亂人目帝女湘川宿折齒巫山下采荇洞庭腹故
以輕薄好千里命艫舳何事非相思江上歲蕤竹

詠懷二首

僕本報恩人走馬救東秦黃龍暗迢遞青泥寒苦辛野
戰劍鋒盡攻城才智貧唯餘一死在留持贈主人
元叔勢位卑長卿宦情寡二頃且營田三錢聊飲馬懸
風白雲上挂月青山下心中欲有言未得忘言者

古意七首

雜虜寇銅鞮征役去三齊扶山剪疏勒傍海掃沈黎劍
光夜揮電馬汗晝成泥何當見天子畫地取關西

匈奴數欲盡僕在玉門關蓮花穿劍鏑秋月掩刀環春
機思窈窕夏鳥鳴錦蠻中人坐相望狂夫終未還

西都盛冠蓋九遠塵霧塞中有惡少年伎能專自得玉
鞭蓮花劍金苴流星勒聊為路傍人寫鞞長楸北

賤妾思不堪採桑渭城南帶減連枝繡髮亂鳳皇一作

簪花舞依長薄蛾一作鵝飛愛綠潭無由報君信流涕向

春蠶

妾本倡家女出入魏王宮既得承瑤輦亦在更衣中蓮
花銜青雀寶粟鈿金蟲猶言不得意流涕憶遼東

何處報君書隴右五岐路泪研兔枝墨筆染鵝毛素碧
浮盃渚水香下洞庭路應歸遂不歸芳春空擲度

妾家橫塘北發豔小長干花釵玉宛轉珠繩金絡紈一作

九幕歷懸丹

一作青

鳳透迤搖白團誰能分見此含恨不

能言

閨怨二首

胡笳屢悽斷征蓬未肯還
妾坐江之介君戍小長安
相去三千里參商書信難
四時無人見誰復重羅紈

春草可攬結妾心正斷絕
綠鬢愁中改紅顏啼裏滅
作獨淚成珠亦見珠成血
願為飛鵲一作雙鵲鏡翩翩照離別

玉臺作
古意

去妾贈前夫

去妾在河橋相思復相遼鳳皇簪落髮蓮花帶緩腰腸
從別處斷貌在淚中消願君憶疇昔片言時見饒

詠少年

董生唯巧笑子都信美目百萬市一言千金買相逐不
道參差菜誰論窈窕淑願言捧繡被來就越人宿

詠雪

微風搖庭樹細雪下簾隙縈空如霧轉凝階似花積不
見楊柳春徒看桂枝白零淚無人道相思空何益

雪

雪逐春風來過集巫山野瀾漫雖可愛悠

一作翻

揚詎堪

把問君何所思昔日同心者坐須風雪霽相期洛城下

春詠

春從何處來拂水復驚梅雪障青瑣闥風吹承露臺美人隔千里羅幃閉不開無由得共語空對相思杯

共賦韻詠庭中桐

龍門有奇價自言梧桐枝華暉實掩映細葉能披離不

降周王子空待歲時移嚴風忽交勁遂使無人知

詠柳

細柳生堂北長風發鴈門秋霜常振葉春露詎濡根朝
作離蟬宇暮成宿鳥園不為君所受摧折當何言

主人池前鶴

本自乘軒者為君階下禽推藏多好貌清唳有奇音稻
梁惠既重華池遇亦深懷恩未忍去非無江海心

寶劍

我有一寶劍出自昆吾溪
照人如照水切玉如切泥
鐔邊霜凜凜匣上風淒淒
寄語張公子何當來見攜

詠燈

昔在鳳皇闕七采蓮花莖
陸離看寶帳爛熳照文屏
檐豔烟光轉氛氲霧裏輕
能方三五夜桂樹月中生

別夏侯故章

白馬黃金羈青驪紫絲鞵
新知關山別故人河梁送置
此一函書為余達雲夢

以服散鎗贈殷鈞

玉鉉布交文金丹煥仙說九沸翻成緩七轉良為切執
以代疏麻長貽故人別

梅花

梅性本輕蕩世人相陵賤故作負霜

集作雪

花欲使綺羅

見但願深相知千

當作早

堆非所戀

征客

公卿來帳別葭聲在狹斜玉樽浮雲蓋朱輪流水車鞞

中懸明月劍杪照蓮花

雜句四首

畫蟬已傷念夜露復沾衣昔別曾何道今夕螢光飛

錦腰連枝滴

一作理

繡領合歡斜夢中誰不見終成亂眼

花

蜘蛛簷下挂絡緯井邊啼何曾得見子照鏡牕東西
泣聽離夕歌悲銜別時酒自從今日去當復相思否

山中雜詩三首

山際見來烟竹中窺落日鳥向簷上飛雲從牕裏出
綠竹可充食女蘿可代裙山中自有宅桂樹籠青雲
具區窮地險嵒山萬里餘奈何梁隱士一去無還書

詠雲二首

飄飄上碧虛藹藹隱青林氛氲如有意縈鬱詎無心
白雲蒼梧來過拂章華臺逢河散復卷經風合且開

詠慈姥磯石上松

根為石所蟠枝為風所碎賴我有貞心終凌細草輩

送呂外兵

白雲浮海際明月落河濱送君長太息徒使淚沾巾

傷友

可憐桂樹枝懷芳君不知摧折寒山裏遂死無人窺

漢魏六朝百三家集卷一百一

欽定四庫全書薈要卷一萬九千六百九十四

集部

漢魏六朝百三家集卷一百二

明 張溥 輯

陳後主集

賦

夜亭度鴈賦

春望山楹日煖苔生雲隨竹動月共水明暫逍遙於夕
逕聽霜鴻之度聲度聲已悽切猶含闕塞鳴從風兮前

侶駛帶暗兮後羣驚帛久兮書字滅蘆束兮斷銜輕行
雜響時亂響雜行時散已定空閨愁還長倡樓歎空閨
倡樓本寂寂况此寒夜褰珠幔心悲調管曲未成手撫
絃脚一彈一彈管且陳歌翻使怨情多

棗賦

芳園列幹森梢繁羅藥餘莖少葉暗枝多復有奇樹風
間臨闕 夜影來未若丹心美實絳質嘉枝重針共暗
枝瓠同瑰羞金盤于冰水薦玉案于深杯此歡心之未

已方夢腸而屢迴

詔

即位詔

上天降禍大行皇帝奄棄萬國攀號擗踊無所迨及朕
以哀煢嗣膺寶歷若涉巨川罔知攸濟方賴羣公用匡
寡薄思播遺德覃被億兆凡厥遐邇咸與惟新可大赦
天下在位文武及孝悌力田為父後者並賜爵一級孤
老鰥寡不能自存者賜穀人五斛帛二匹

諮詢詔

堯施諫鼓禹拜昌言求之異等久著前徽舉以淹滯復
聞昔典斯乃治道之深規帝王之切務朕以寡昧丕承
鴻緒未明虛己日旰興懷萬機多紊四聰弗達思聞謇
諤採其謀計王公已下各薦所知旁詢管庫爰及輿阜
一介有能片言可用朕親加聽覽佇於啟沃

舉賢詔

夫體國經野長世字氓雖因革儻殊弛張或異至於旁

求俊乂爰逮側微用道和羹是隆大厦上智中主咸由
此術朕以寡薄嗣膺景祚雖哀疚在躬情慮惛舛而宗
社任重黎庶務殷無由自安拱默敢忘康濟思所以登
顯髦彥式備周行但空勞宵夢屢勤史卜五就莫來五
能不至是用申旦凝慮丙夜損懷豈以食玉炊桂無因
自達將懷寶迷邦咸思獨善應內外衆官九品已上可
各薦一人以會彙征之旨且取備實難舉長或易小大
之用明言所施勿得南箕北斗名而非實其有負能仗

氣擯壓當時著賓戲以自憐草客朝以慰志人生一世
逢遇誠難亦宜去此幽谷翔茲天路趨銅駝以觀國望
金馬而來庭便當隨彼方圓飭之矩矱

求言詔

昔睿后宰民哲王御寓雖德稱汪濊明能普燭猶復紆
已乞言降情訪道高咨岳牧下聽輿臺故能政若神明
事無悔吝朕纂承丕緒思隆大業常懼九重已邃四聰
未廣欲聽昌言不疲痺足若逢廷折無憚批鱗而口柔

之辭儻聞於在位腹誹之意或隱於具僚非所以弘理
至公緝熙帝載者也內外卿士文武衆司若有智周政
術心練治體救民俗之疾苦辨禁網之疎密者各進忠
讜無所隱諱朕將虛己聽受擇善而行庶深鑒物情匡
我王度

柔遠詔

中歲克定淮泗爰涉青徐彼土酋豪並輸罄誠欵分遣
親戚以為質任令舊土淪陷復成異域南北阻遠未得

會同念其分乖殊有愛戀夷狄吾民斯事一也何獨譏
禁使彼離析外可即檢任子館及東館并帶保任在外
者並賜衣糧頒之酒食遂其鄉路所之阻遠便發遣船
仗衛送必令安達若已預仕宦及別有事義不欲去者
亦隨其意

勸農詔

躬推為勸義顯前經力農見賞事昭往誥斯乃國儲是
資民命攸屬豐儉隆替靡不由之夫入賦自古輸藁惟

舊沃饒貴于十金硯确至於三易腴墾既異盈縮不同
詐偽日興簿書歲改稻田使者著自西京不實峻刑聞
諸東漢老農懼於祇應俗吏因而侮文輟耒成羣游手
為伍永言妨蠹良可太息今陽和在節膏澤潤下宜展
春耨以望秋坻其有新闢墾畷進墾蒿萊廣袤勿得度
量征租悉皆停免私業久廢咸許占作公田荒縱亦隨
肆勤儻良守教耕淳民載酒有茲督課議以賞擢外可
為格班下稱朕意焉

恤民詔

耕鑿自足乃曰淳風貢賦之興其來尚矣蓋由庚亟務
不獲已而行焉但法令滋章奸盜多有俗尚澆詐政鮮
惟良朕日旰夜分矜一物之失所泣辜罪己愧三千之
未措望訂初下使疆蔭兼出如聞貧富均起單弱重弊
斯豈振窮扇暘之意歟是乃下吏箕斂之苛也故曰百
姓不足君孰與足自太建十四年望訂租調逋未入者
並悉原除在事百僚辯斷庶務必去取平允無得便公

害民為己聲績妨紊政道

禁奢詔

朕臨御區宇撫育黔黎方欲康濟澆薄蠲省繁費奢僭
乖衷實宜防斷應鏤金銀薄及庶物化生土木人綵花
之屬及布帛幅尺短狹輕疎者並傷財廢業尤成蠹患
又僧尼道士挾邪左道不依經律民間淫祀祆書諸珍
怪事詳為條制並皆禁絕

訊獄詔

夫議獄緩刑皇王之所垂範勝殘去殺仁人之所用心
自畫冠既息刻吏斯起法令滋章手足無措朕君臨區
宇屬當澆末輕重之典在政未康小大之情興言多愧
眷茲狴犴有軫哀矜可克日於大政殿訊獄

赦詔

朕以寡薄嗣守鴻基哀惻切慮疹恙纏織訓俗少方臨
下靡算懼甚踐冰慄同馭朽而四氣易流三光適至纓
紱列陛玉帛充庭具物匪新節序疑舊緬思前德永慕

昔辰對軒闈而哽心顧辰筵而慄氣思所以仰遵遺構
俯勵薄躬陶鑄九流休息百姓用弘寬簡取叶陽和可
大救天下

又赦詔

惟刑止暴惟德成物三才是資百王不改而世無抵角
時鮮犯鱗涓橋驚馬弗聞廷爭桃林逸牛未見其旨雖
剽悍輕侮理從鉗歛蠢愚杜默宜肆矜弘政乏良哉明
慙則哲求諸刑措安可得乎是用屬寤寐以軫懷負黼

辰而於邑復茲合璧輪缺連珠緯舛黃鍾獻呂和氣始
萌玄英告終履長在御因時宥過抑乃斯得可大赦天
下

又赦詔

柏皇大庭鼓溥和於曩日姬王羸后被澆風於未載刑
書已鑄善化匪融禮義既乖奸宄斯作何其溥朴不反
浮華競扇者與朕居中御物納隍在睠頻恢天網屢絕
三邊元元黔庶終懼五辟蓋乃康哉寡薄抑焉法令滋

章是用當宁弗怡矜此向隅之意今三元具序萬國朝
辰靈芝獻於始陽膏露凝於聿歲從春施令仰乾布德
思與九有惟新七政可大赦天下

宣聖禮典詔

宣尼誕膺上哲體資至聖祖述憲章之典並天地而合
德樂正雅頌之奧與日月而偕明垂後昆之訓範開生
民之耳目梁季湮微靈寢忘處鞠為茂草三十餘年敬
仰如在永惟愍息今雅道雍熙由庚得所斷琴故履零

落不追閱筭開書無因循復外可詳之禮典改築舊廟
蕙房桂棟咸使惟新芳繁潔潦以時饗奠

答姚察詔

察居父憂以忠毅將軍起兼東宮通事舍人
頻有陳讓不許詔答之俄勅知著作郎事

省表具懷卿行業淳深聲譽素顯理徇情禮未膺刀筆
但參務承華良所期寄允茲抑奪不得致辭也

追贈徐陵詔

慎終有典抑乃舊章令德可甄諒宜追遠侍中安右將

軍左光祿大夫太子少傅南徐州大中正建昌縣開國
侯陵弱齡學尚登朝秀穎業高名輩文曰詞宗朕近歲
承華特相引狎雖多卧疾方期克壯奄然殞逝震悼于
懷可贈鎮右將軍特進其侍中左光祿鼓吹侯如故并
出舉哀喪事所須量加資給謚曰章

追封吳明徹詔

李陵矢竭不免請降于禁水漲猶且生獲固知用兵上
術世罕其人故侍中司空南平郡公明徹爰初躡足乞

屈元戎百戰百勝之奇決機決死之勇斯亦侔於古焉
及招定淮淝長驅彭汴覆勅寇如舉毛掃銳師同沃雪
風威懾於異俗功效著於同文方欲息駕陰山解鞍瀚
海既而師出已老數亦終奇不就結纓之功無辭入楮
之屈望封嶠之為易冀平翟之非難雖志在屈伸而奄
中霜露埋恨絕域甚可嗟傷斯事已往累逢肆赦凡厥
罪戾皆蒙灑濯獨此孤魂未霑寬惠遂使爵土湮沒饗
醑無主棄瑕錄用宜在茲辰可追封邵陵縣開國侯食

邑一千戶以其息惠覺為嗣

追贈程文季詔

故散騎常侍前重安縣開國公文季纂承門緒克荷家聲早歲出軍雖非元帥啟行為最致果有聞而覆喪車徒允從黜削但靈洗之立功扞禦久而見思文季之埋菟異域有足可憫言念勞舊傷茲廢絕宜存廟食無使餒而可降封重安縣侯邑一千戶以子饗襲封

追贈司馬申詔

慎終追遠欽若舊則闔棺定謚抑乃前典故散騎常侍
右衛將軍文始縣開國伯申忠肅在公清正立已治繁
處約投軀殉義朕任寄情深方康庶績奄然化往傷惻
于懷可贈侍中護軍將軍進爵為侯增邑為五百戶謚
曰中給朝服一具衣一襲尅日舉哀喪事所須隨由資
給

葬伯固以庶人禮詔

伯固同茲悖逆殞身途路今依外議意猶弗忍可特許

以庶人禮葬

原伯固諸子詔

伯固隨同巨逆自絕於天俾無遺育抑有恒典但童孺靡識兼預葭莩寘之甸人良以惻憫及伯固所生王氏可並特宥為庶人

勅

答江總等勅

吏部尚書蔡徵移中書令後主方擇其人總等咸共薦察勅答之

姚察非惟學藝優博亦是操行清脩典選難才今得之矣

報謝貞勅

貞為南平王友掌記室事以母憂去職頃之勅起還府貞累啟固辭勅報之貞竟以毀卒

省啟具懷雖知哀莞在疚而官俟得才禮有權奪可便力疾還府也

策

授江總尚書令策

於戲夫文昌政本司會治經韋彪謂之樞機李固方之
斗極況其五曹斯綜百揆是諧同冢宰之司專臺閣之
任惟爾道業標峻寓量弘深勝範清規風流以為準的
辭宗學府衣冠以為領袖故能師長六官具瞻允塞明
府八座儀形載遠其端朝握揆朕所望焉往欽哉懋建
爾徽猷亮采我邦國可不慎歟

制

討叔陵制

凶逆梟獍反噬宮闈賴宗廟之靈時從釋滅撫情語事
酸憤兼懷朝議有章宜從所奏也

書

與詹事江總書

管記陸瑜奄然殂化悲傷悼惜此情何已吾生平愛好
卿等所悉自以學涉儒雅不逮古人欽賢慕士是情尤
篤梁室亂離天下靡沸書史殘缺禮樂崩淪晚生後學
匪無牆面卓爾出羣斯人而已吾識覽雖局未曾以言

議假人至於片善小才特用嗟賞況復洪識竒士此故
忘言之地論其博綜子史諳究儒墨經耳無遺觸目成
誦一褒一貶一激一揚語玄析理披文摘句未嘗不聞
者心伏聽者解頤會意相得自以為布衣之賞吾監撫
之暇事隙之辰頗用譚笑娛情琴樽間作雅篇艷什迭
互鋒起每清風朗月美景良辰對群山之參差望巨波
之澗瀆或翫新花時觀落葉既聽春鳥又聆秋鴈未嘗
不促膝舉觴連情發藻且代琢磨間以朝譔俱怡耳目

並留情致自謂百年為速朝露可傷豈謂玉折蘭摧遽
從短運為悲為恨常復何言遺跡餘文觸目增泣絕絃
投筆恒有酸恨以卿同志聊復敘懷涕之無從言不寫
意

銘

護軍孫瑒銘

瑒卒江總為其誌銘後主又題銘
後四十字遣蔡徵宣勅就宅鐫之

秋風動竹煙水驚波幾人樵徑何處山阿今時日月宿

昔綺羅天長路遠地久雲多功臣未勒此意如何

樂府

採桑

春樓髻梳罷南陌競相隨去後花叢散風來香處移
廣袖承朝日長鬟碍聚枝柯新攀易斷葉嫩摘前萎
採繁鈎手弱微汗雜粧垂不應歸獨早堪為使君知

日出東南隅行

重輪上瑞暉西北照南威南威年二八開牖敞重闈當

壚送客去上苑
逐春歸髻下珠
勝月牕前雲帶衣
紅裙結未解
綠綺自難徽

三婦艷詞十一首

大婦避秋風中婦夜牀空
小婦初兩髻含嬌新臉紅
得意非霰日可憐那可同

大婦西北樓中婦南陌頭
小婦初粧點回眉對月鉤
可憐還自覺人看反更羞

大婦主一作弄練機中婦裁春衣
小婦新粧冶拂匣動琴

徽長夜理新曲餘嬌且未歸

大婦妬蛾眉中婦逐春時小婦最年少相望捲羅幃羅幃夜寒卷相望人來遲

大婦上高樓中婦蕩蓮舟小婦獨無事撥帳掩嬌羞丈夫應自解更深難道留

大婦初調箏中婦飲歌聲小婦春粧罷弄月當宵楹季子時將意相看不用爭

大婦愛恒偏中婦意常堅小婦獨嬌笑新來華燭前新

來誠可惑為許得新憐

大婦酌金杯中婦照粧臺小婦偏妖冶下砌折新梅衆
中何假問人今最後來

大婦怨空閨中婦夜偷啼小婦獨含笑正柱作烏棲河
低帳未掩夜夜畫眉齊

大婦正當壚中婦裁羅襦小婦獨無事淇上待吳姝鳥
歸花復落欲去却踟躕

大婦年十五中婦當春戶小婦正橫陳含嬌情未吐所

愁曉漏促不恨燈銷炷

飛來雙白鶴

朔吹已蕭瑟愁雲屢合開
玄冬辛苦地白鶴從風催
音響已清切毛羽復殘摧
飛來進闕但為失雙回儻逢

曾參德當共銜珠來

採蓮曲

相催暗中起妝前日已先
隨宜巧注口薄落點花黃
風住疑衫密船小畏裾長
波文散動檝芡花拂度航
低荷

亂翠影采袖新蓮香歸時會被喚且試入蘭房

昭君怨

圖形漢宮裡遙聘單于庭狼山聚雲暗龍沙飛雪輕笳
吟度隴咽笛轉出關鳴啼粧寒葉下愁眉塞月生只餘
馬上曲猶作別時聲

朱鷺

參差蒲未齊沈漾若浮綠朱鷺戲蘋藻裴徊流澗曲澗
曲多巖樹逶迤復斷續振振雖以明湯湯今又矚

巫山高

巫山巫峽深峭壁聳春林風巖朝蕊落霧嶺晚猿吟雲
來足薦枕雨過非感琴仙姬將夜月度影自浮沉

有所思三首

蕩子好蘭期留人獨自思落花同淚臉初月似愁眉階
前看草蔓牕中對網絲不言千里別

一作望

復是三春時

杳杳與人期遥遥有所思山川千里間風月兩邊時相
對春那劇相望景偏遲當由分別久夢來還自疑

佳人在北燕相望渭橋邊團團落日樹耿耿曙河天愁
多明月下淚盡鴈行前別心不可寄惟餘琴上絃

雉子班

四野秋原暗十步啄方前雉聲風處遠翅影雲間連箭
射妖姬笑裘值盛明然已足南皮賞復會北宮篇

臨高臺

晚景登高臺迴望春光來霧濃山後暗日落雲傍開烟
裏看鴻小風來望葉回臨窻已響吹極眺且傾杯

隴頭

隴頭征戍客寒多不識春
驚風起嘶馬苦霧雜飛塵
投錢積石水斂轡交河津
四面夕冰合萬里望佳人

隴頭水二首

塞外飛蓬征隴頭
流水鳴漠處揚沙暗
波中燥葉輕地風冰易厚
寒深溜轉清登山一回顧
幽咽動邊情

高隴多悲風寒聲起夜叢
禽飛暗識路鳥轉逐征蓬
落葉時驚沫移沙屢擁空
回頭不見望流水玉門東

折楊柳二首

楊柳動春情，倡園妾屢驚。入樓含粉色，依風雜管聲。武
昌識新種，官渡有殘生。還將出塞曲，仍共胡笳鳴。

長條黃復綠，垂絲密且繁。花落幽人徑，步隱將軍屯。谷
暗宵鉦響，風高夜笛喧。聊持暫攀折，空足憶中園。

關山月二首

秋月上中天，迥一作迴照關城前。暈缺隨灰滅，光滿應珠

圓。帶樹還添桂，銜峯乍似弦。復教征戍客，長怨久連翩。

戍邊歲月久恒悲望舒耀城遥接暈高澗風連影搖寒
光帶岫徒冷色含山峭看時使人憶為似嬌娥照

洛陽道五首

誼譁照邑里遨遊出洛京霜枝嫩柳發水塹薄苔生停
鞭回去影駐軸敞前甍臺上經相識城下屢逢迎踟躕
還借問只重未知名

日光朝杲杲照耀東京道霧帶城樓開啼侵曙色早佳
麗嬌南陌香氣含風好自憐釵上纓不歎河邊草

建都開洛汭中地乃城陽縱橫肆八達左右闢康莊銅
溝飛柳絮金谷落花光忘情伊水側稅駕河橋傍
百尺瞰金埒九衢通玉堂柳花塵裏暗槐色露中光游
俠幽并客當壚京兆粧向夕風煙晚金羈滿洛陽
青槐夾馳道御水映銅溝遠望凌霄闕遙看井榦樓黃
金彈俠少朱輪盛徹侯桃花雜渡馬紛披聚陌頭

長安道

建章通未央長樂屬明光大道移甲第甲第玉為堂遊

蕩新豐裏戲馬渭橋傍
當壚晚留客夜夜苦紅粧

梅花落二首

春砌落芳梅飄零上鳳臺
拂粧疑粉散逐溜似萍開
映日花光動迎風香氣來
佳人早挿髻試立且裴徊

楊柳春樓邊車馬飛風煙連
娉烏孫伎屬客單于
羶鴈聲不見書蠶絲欲斷
弦欲持塞上葢試立將軍前

紫騮馬二首

嫖姚紫塞歸蹀躞紅塵飛
玉珂鳴廣路金絡耀晨輝
葢

轉時移影香動屢驚衣禁門猶未閉連騎恣相追
蹀躞紫駟馬照耀白銀鞍直去黃龍外斜趨元菟端垂
韉還細柳揚塵歸上蘭紅臉桃花色客別重羞看

雨雪曲

長城飛雪下邊關地籟吟濛濛九天暗霏霏千里深樹
冷月恒少山霧日偏沉沉聽南歸鴈切思胡笳音

劉生

遊俠長安中置驛過新豐擊鐘蒲壁磬鳴弦楊葉弓孟

公正驚客朱家始賣僮羞作荆卿笑捧劍出遼東
飲馬長城窟行

征馬入他鄉山花此夜光離羣嘶向影因風屢動香月
色含城暗秋聲襍塞長何以酬天子馬革報疆場

楊叛兒曲

青春上陽月結伴戲京華龍媒玉珂馬鳳軫繡香車水
映臨橋樹風吹夾路花日昏歡晏罷相將歸狹斜

舞媚娘三首

樓上多嬌艷當牕并三五爭弄遊春陌相邀開繡戶轉
態結紅裙含嬌拾翠羽留賓乍拂絃託意時移柱

淇水變新臺春壚當夏開玉面含羞出金鞍排夜來

春日好一作多風光尋觀向市傍轉身移佩響牽袖起衣

香

估客樂

三江結儔侶萬里不辭遙恒隨鷓首舫屢逐雞鳴潮

三洲歌

春江聊一望細草遍長洲沙汀時起伏畫舸屢淹留
前有一樽酒行

殿高絲吹滿日落綺羅鮮莫論朝漏促傾卮待夕筵
自君之出矣六首

自君之出矣霜暉當夜明思君若風影來去不曾停
自君之出矣房空帷帳輕思君如畫燭懷心不見明
自君之出矣不分道無情思君若寒草零落故心生
自君之出矣塵網暗羅幃思君如落日無有暫還時

自君之出矣綠草遍階生思君如夜燭垂淚著雞鳴
自君之出矣愁顏難復覩思君如藥條夜夜只交苦

玉樹後庭花

麗宇芳林對高閣新妝艷質本傾城映戶凝嬌乍不進
出惟含態笑相迎妖姬臉似花含露玉樹流光照後庭

烏棲曲三首

陌頭新花歷亂生葉裏啼鳥送春情長安遊俠無數伴
白馬驪珂路中滿

金鞍向暝欲相連，玉面俱要來帳前。
含態眼語懸相解，蟹音翠帶羅裙入為解。

合歡襦薰百和香，林中被織兩鴛鴦。
烏啼漢沒天應曙，只持懷抱送郎去。

東飛伯勞歌

池側鴛鴦春日鶯，綠珠絳樹相逢迎。
誰家佳麗過淇上，翠釵綺袖波中漾。
雕軒繡戶花恒發，珠簾玉砌移明月。
年時二七猶未笄，轉顧流盼鬢髻低。
風飛葢落將一作時

何故可惜可憐空擲度

長相思二首

長相思久相憶關山征戍何時極望風雲絕音息上林
書不歸迴文徒自織羞將別後面還似初相識

長相思怨成悲蝶紫草樹連絲庭花飄散飛入帷帷中
看隻影對鏡斂雙眉兩見同見月兩別共春時

古曲

桂鉤影桂枝開紫綺袖逐風迴日明珠色偏亮葉盡衫

香更來

獨酌謠四首 并序

齊人淳于髡善為十酒偶效之作獨酌謠

獨酌謠獨酌且獨謠一酌豈陶暑二酌斷風颺三酌意
不暢四酌情無聊五酌孟易覆六酌懽欲調七酌累心
去八酌高志超九酌忘物我十酌忽凌霄凌霄異羽翼
任致得飄飄寧學世人醉揚波去我遙爾非浮丘伯安

見王子喬

獨酌謠獨酌起中宵中宵照春月初花發春朝春花春
月正裘徊一尊一絃當夜開聊奏孫登曲仍斟畢卓杯
羅綺徒紛亂金翠轉遲回中心本如水凝志更同灰逍
遙自可樂世語世情哉

獨酌謠獨酌酒難消獨酌三兩盃弄曲兩三調調絃忽
未畢忽值出房朝更似遊春苑還如逢麗譙衣香逐嬌
去眼語送杯嬌餘樽盡復益自得是逍遙

獨酌謠獨酌一尊酒尊酒傾未酌明月正當牖是牖非

圓甕吾樂非擊缶自任物外懽更齊椿菌久卷舒乃一卷忘情且十斗寧復語綺羅因情即山藪

詩

同江僕射遊攝山棲霞寺

以下
五言

時宰磻溪心非關狎竹林鷺嶽青松遶雞峰白日沉天
迥浮雲細山空明月深摧殘枯樹影零落古藤陰霜村
夜鳥去風路寒猿吟自悲堪出俗詎是欲抽簪

同平南弟元日思歸

至德掩羲黃成功邁禹湯儀刑元四海來庭盛萬方鳴
玉觀升降擊石乃鏗鏘三春氣色早九疑煙霧長浮雲
斷更續輕花落復香北宮瞻遠岫南服阻遙江爾言想
伊洛我思屬瀟湘

立春日汎舟玄圃各賦一字六韻成篇

春光反禁苑瞬日暖源桃霄煙近漠漠暗浪遠滔滔石
苔侵綠蘚岸草發青袍迴歌逐轉楫浮冰隨度刀遙看
柳色嫩迴望鳥飛高自得欣為樂忘意若臨濠

獻歲立春光風具美汎舟玄圃各賦六韻

寒輕條已翠春初未轉禽野雪明巖曲山花照迥林苔
色隨水溜樹影帶風沉沙長見水落歌遙覺浦深餘輝
斜四戶流風颺八音既此留連席道欣放曠心

上巳宴麗暉殿各賦一字十韻

芳景滿闈牕暄光生遠阜更以登臨趣還勝被禊酒日
照源上桃風搖城外柳斷雲仍合霧輕霞時映牖遠樹
帶山高嬌鶯含響偶一峯遙落日數花飛映綬度鳥或

遛檐飄絲屢薄藪言志述為樂置觴方薦壽文學且迺
筵羅綺令陳後干戈幸勿用寧須勞馬首

上己玄圃宣猷堂禊飲同共八韻

綺殿三春晚玉燭四時平藤交近浦暗花照遠林明百
戲堦庭滿八音絃調清鶯喧雜管韻鐘響帶風生山高
雲氣積水急溜杯輕簪纓今盛此俊又本多名帶才盡
壯思文采發雕英樂是西園日歡茲南館情

春色禊辰盡當曲宴各賦十韻

餘春尚芳菲中園飛桃李是時乃季月茲日叶上已既有遊伊洛可以袞溱洧得性足為娛高堂聊復擬高堂亦有趣圖續此芳軌棲遁稱式驂善政日馴雉蘭桂觀往轍簪裙躡前趾啼禽靜或喧花落低還起水霧遙混襟山雲遠相似坐客聽一言隨吾祛俗鄙

袞禊汎舟春日玄圃各賦七韻

園林多趣賞袞禊樂還尋春池已澌漫高枝自從森日裏綠光動水中花色沉安流淺易榜峭壁迥難臨野鶯

添管響深岫接鏡音山遠風煙麗苔輕激浪侵置酒來
英雅嘉賢良所欽

上巳玄圃宣猷禊酌各賦六韻

園開簪帶合亭迴春芳過鶯度遊絲斷風駛落花多峯
幽來鳥嚮洲橫擁浪波歌聲初出牖舞影乍侵柯面玉
同釵玉衣羅異草蘿既悅弦筒暢復歡文酒和

七夕宴宣猷堂各賦一韻詠五物用得帳屏風

案唾壺履

錦作明玳牀黼垂光粉壁帶日芙蓉照因吹芳芬折

帳

織成如縠綵琉璃畏風擊秦宮得絕超漢座殊斑敵

屏風

已羅七俎滿兼逢百品易張陳答贈言梁室齊眉席

案

蘊仙此還異掌漏翻非役待臣乃執捧良賓乃投擲

唾壺

賢舍觀穴踵瓜田覩躡迹矩步今有儀用此前嘉客

履

七夕宴重詠牛女各為五韻

明月照高臺仙駕忽裴徊雷徙聞車度霞上見粧開房
移看動馬斗轉望斟杯靨色隨星去髻影襟雲來更覺

今宵短只遽日輪催

同管記陸琛七夕五韻

亭亭秋月明團團夕露輕鳳駕今時度霓騎此宵迎疏
上綵霞動粉外白雲生故嬌隔分別新歡起舊情含笑
不終夜香風空自停

七夕宴樂修殿各賦六韻

秋初芰荷殿寶帳芙蓉開玉笛隨弦上金鈿逐照迴釵
光瑤瑁柱色輕玫瑰笑靨人前斂衣香動處來非同

七襄駕詎隔一春梅神仙定不及寧用流霞杯

七夕宴玄圃各賦五韻

殿深炎氣少日落夜風清月小看針暗雲開見縷明
絲調聽魚出吹響間蟬聲度更銀燭盡陶暑玉卮盈
星津雖可望詎得似人情

同管記陸瑜九日觀馬射

晴朝麗早霜秋景照堂皇
榦慘風威切荷彫池望荒樓
高看鴈下葉散覺山涼
歇霧含空翠新花濕露黃
飛禽

接旆影度日轉鉞光連翻北
幽騎馳射西園傍勒移碼
碯色鞭起珊瑚揚已同過隙
遠更異良弓藏且觀千里
汗仍瞻百步揚非為從逸
賞方追塞外羌

畫堂良夜履長在節歌管賦詩
迺筵命酒十韻
成篇

季冬初陽始寒氣尚蕭颯原
葉成委低岫雲時吐欲雕
樹乍疎迴遠峯自重杳雲興
四山霾風動萬籟答肅肅
凝霜下我我層冰合複殿可
以娛於茲多延納迢迢百

尺觀杳杳三休閣前後訓導屏左右文衛臣進退簪纓
移縱橫壯思襟幸矣天地泰當無范唯拉

同管記陸瑜七夕四韻

河漢言清淺相望限煙霄雲生劍氣沒槎還客宿遙月
上仍為鏡星連可作橋唯當有今夕一夜不迢迢

初伏七夕已覺微涼既引應徐且命燕趙清風
朗月以望七襄之駕置酒陳樂各賦四韻之

篇

廣席多才俊重合引珠妍管絃檐外響羅綺樹中鮮舉
針還向月上憐復依筵度河將闕殿相看併是僊

晚宴文思殿

晚日落餘暉宵園翠蓋飛荷影侵池浪雲色入山扉螢
光息復起暗鳥去翻歸樂極未言醉杯深猶恨稀

宴光壁殿詠遙山燈

照耀浮輝明飄飄落燼輕枝多含樹影煙上帶珮生雜
桂還如月依柳更疑星園中鶴未麗池上鳧飛驚

三善殿夕望山燈

重岫多風煙華燈此岫邊
涸浦如珠露彫樹似花
鈿依樓雜度月帶石影開
蓮既有常滿照羞與曉星連

入隋侍宴應詔

日月光天德山河壯帝居
太平無以報願上東封

一作萬年

書

幸元武湖餞吳興太守任惠

寒雲輕重色秋水去來波
待我戎衣定然送大風歌

宴詹事陸繕省

禁闥九重中宴賞三春日雲收上樹隱葉長宮槐密水
綠已浮苔花舒正含實

闕

聽箏

雜言

文牕玳瑁影嬋娟香帷翡翠出神仙促柱點唇鶯欲語
調弦繫爪鴈相連秦聲本自楊家解吳歎那知謝傳憐
祇愁芳夜促蘭膏無那煎

戲贈沈后

留人不留人不留人也去此處不留人自有留人處

隋渠詩

隋煬帝夕泛舟北海忽見水上有小舟至乃陳後主也帝起迎之後主曰聞陛下開隋渠引洪河之水東遊維揚因作詩以奏

隋室開茲水初心謀大賒一千里力役百萬民吁嗟水
殿不復返龍舟成小瑕溢流隨徒岸濁浪噴黃沙兩人
迎客至三月柳飛花日脚沉雲外榆梢噪暝鴉如今遊
子俗異日便天家且樂人間景休尋海上槎人喧舟艤

岸風細錦帆斜莫言無後利千古壯京華

小牕詩

煬帝昏酒嘗遊吳公宅雞臺忽與陳後主相遇後主復書數十篇帝止記小牕及寄侍兒碧玉

詩

午醉醒來晚無人夢自驚夕陽如有意偏傍小牕明

寄碧玉詩

離別腸應斷相思骨合銷愁魂若飛散憑仗一相招

漢魏六朝百三家集卷一百二



總校官庶吉士臣侍朝

校對官中書臣張塤

騰錄監生臣張曾溶